

efformant, nimirum 1|| hoc est aquæ, unde civitati nomen inditum.

Ad urbis Notapeliotem datur fons aquæ calidæ, quo Asthmatici, & obstructionis morbis laborantes loti, facile sanantur.

Quarta urbs

V U T I N G.

Hujus etiam urbis territorium Tien regni pars fuit, Hana familia terris Yecheu adscripsit, Suius Quencheu, sub Tanga familia Tacheu dicta, ab Juena familia hodiernum nomen obtinet: quatuor regit civitates, 1 Vuting, 2 Hokio, 3 Yuenmeu, 4 Lokuén. Iacet metropoleos regioni vicina, & si quæ alia, amœnum ac fertilem terræ tractum possidet, per quem Kinxa fluvius duplex fluit, multæque eum aliæ aquæ fecundant: militaris est urbs, militumque habet sat amplum præsidium, quia Queicheu finitima est, ubi à montanis populis periculum potest imminere: muscho etiam abundat; & quia gratissima ovibus pascua habet, frequentes alit greges.

Montes.

Umong mons maximus ad ortum urbis, duodecim attollit vertices.

Hingkieu mons circa Lokuén, undique horridus ac præruptus, in vertice tamen planus est: & per arctissimam viam, unius tantum hominis capacem, patet solummodo ascensus; bellorum tempore suis accolis optimum præbet asyllum.

Çokieu mons ad Hokio, vocatur vulgo continuum ver, quia nullam, aut exiguam sentit tempestatum anni mutationem, perpetuo virefcit: ad occasum ejus ingens est caverna velut abyssus, in qua hominis ac animalis cujusdam statua visitur; scribunt, si quis forte statuam spectans altius loquatur, continuo tonitrua ac tempestates insurgere, sed fides sit penes Sinas.

Flumina.

Hoeinia lacus ad urbis Barrolybicum quinque stadiorum est, undique arboribus pulchre septus, vocatur reddens aves, quia folia, quæ in eum incidunt, non omnia, sed certæ arboris, in nigras mutantur aviculas, tanta cum admiratione ac stupore accolarum, ut spiritus esse credant, ita inquit Sinicus auctor.

Folia in aviculas mutantur.

Hiangxui fons, hoc est aquæ odoriferæ, quia Vere præcipue redolet, quo tempore incolæ ob rei insolentiam sacra fonti faciunt, & aquam vino mixtam, seu liquori ex oryza confecto, ebibunt: hanc aquam multis morbis mederi volunt.

Quinta Urbs

C I N T I E N.

Nihil superiore minus pingues, fertilesque campos hæc urbs obtinet, à frequentibus iisque sedulis agricolis cultos, ac à pastoribus frequentatos: non paucos numerat pagos, licet sub se civitatem nullam habeat: urbs ipsa Queicheu Provinciæ vicinissima est, olim etiam regni Tien fuit hic locus, & Cintien dictus, quod nomen etiamnum retinet.

Juecu mons ad urbis Barrapeliotem, quinquaginta stadia occupat. versus occasum Into mons est, qui adeo salubri fruitur aëre, ut degentes in eo ægrotudines, quas ventus aut frigidior aër causet, ignorent: æstate commodissima ibi statio est, ad vitandos calores caniculares.

Montes.

Che lacus ingens, qui etiam Cingxui mare dicitur, inter montes ad occasum urbis est, in quem ex montibus rivuli omnes influunt.

Flumina.

Sexta Urbs

L I K I A N G.

Hujus regionis incolæ omnes ex priscorum Sinarum deductis huc illucque coloniis orti sunt, ac licet non omnino Sinicas sequantur leges, quia ex aliarum nationum vicinia aliis sæpe moribus fuerunt imbuti, ut plurimum tamen Sinas suos imitantur; potui multum sunt dediti, ac largiter se ingurgitant, inde cantionibus ac tripudiis delectantur; equitare ac sagittas emittere dextre norunt: optimam ac pinguem inhabitant regionem, eamque auro gravidam; succinum etiam habent, ac nudes pineas. Urbs ipsa jacet in maxime occidentali hujus provinciæ parte, ad Boream urbis Tali, cujus territorium auriferus Kinxius medium secatur, Lançang vero fluvius claudit ad occasum. Supra Kinxa pontem habet ex ferreis catenis concinnatum, inter montium intercapedinem interjectum, qualem supra descripsi. quinque urbs regit civitates: 1 Likiang, 2 Paoxan, 3 Lan, 4 Kiucin, 5 Linfi. Hana familia Juechi hunc vocavit locum, Tanga Hicheu, hodiernum nomen Juena dedit familia.

Sive mons ad urbis Barrolybicum Tibet regnum versus, ab assiduâ nivibus, quæ num-

Montes.